

Poldi Taitusdok pepa youliminguk

Yodakale Mede

Taitus adi Judahi'walaŋ feknit mokitneniŋ ala adi Kilsto Jesu'walaŋ gawaŋbop tomboyokuk. Tiŋa Pol tubulodaŋ Wapum'walaŋ Mede Momooŋ nonŋoŋ yohauta yaugumuk. Ala mindaŋkade Taitus adi Kilit uŋoŋ hati kwanai tuguk doktiŋa Poldi Taitus pepa i youlimiŋa gawaŋbop undihi maaneŋ talitimenŋ kwanai dediŋ titiŋdok wendok nindakaleguk. Tiŋa undugoŋ gawaŋbop wendok maaneŋ metam gawadahi, eŋ metam kuya eŋ metam tipilapilaye kwanai tuwaŋit mokit hati-taginŋ doktiŋa Wapum'walaŋ Mede Momooŋ u tuwolithik gineŋ tiulidokoŋ yenihautaluwaakdok youliminguk. Mindaŋ adi Taitusdi gawaŋbopŋiye yenindokoune tosiwe be mik-kwadi wabiŋa menot tiŋa welekubugoŋ gineŋ hatiyaneŋdok youliminguk.

Yodakale eŋ yokahaŋ mede

1 ¹Nu Pol, nu Bepaŋ'walaŋ tipilapilaye-meŋiŋ, eŋ Jesu Kilsto'walaŋ Aposelŋiŋ. Nu yadi negoŋ nehitubu-dakaleeŋ metam netok gigit yoŋa yabukahileguk heki'walaŋ nadisukilitihik tubukilitiyemdok, eŋ mede biyagoŋ hinek u nadidakaleeŋ Bepaŋ'walaŋ titiŋŋiŋ hogok takaliyaneŋdok yoŋa nanindapmaŋ naniŋkukuk. ²Nu yehitubu-lodawene nadisukiliti fafaŋeŋ tiŋa Bepaŋdi hatihati dapmandapmaŋnit mokit yembaak wendok woomhatiyaneŋ yoŋa fafaŋe kwanai tilat. Bepaŋ yalaŋ mu yolak adi koomkwaha nemek nemu tububihila kameŋila hatihati u agaŋ nimdok yofafaŋeguk. ³Tiŋa mindaŋ ne nai nadigukneŋ tuwot medeŋiŋ u yohautaune Bepaŋ Tubulodanikdi nu yotubuhautawit yoŋa nanindapmaguk. ⁴Taitus, pepa yoŋ adi dutok youkamulat. Du adi mihine hinek, tiŋa undugoŋ nadisukilitige adi indi'walaŋdok tuwolit hinek. Baŋ Bepaŋ eŋ Tubulodanik Kilsto Jesu adi'walaŋ siloŋ tobogoŋ eŋ kulemadi dugut haliwooŋ halaak.

Gawaᅇbop kadokome diniᅇ mede

⁵Kwanai dikidiki mu didimehinakaguk u tubudidimedok, tiᅇa koom ganingut unduᅇ yokwet wapuhineᅇ kayoᅇbop haliwiᅇiᅇ indigoᅇ tuwot me talitimeᅇ yapmetawaan, unduᅇ yoᅇa Kilit kwet kambangit^a luhineᅇ uᅇgoᅇ gapmegut. ⁶Me, metam namandahik foloᅇ yomnit mokit hatiᅇiᅇ, eᅇ tamhik kubugoᅇ hogok, eᅇ wapmihihye adi Kilisto nadisukilitimiᅇiᅇ, tiᅇa adi metam namandahik foloᅇ kadakanᅇiᅇ mu tiᅇiᅇ eᅇ foko tiᅇa mehim-behiye'walaᅇ mede wobu mu tiᅇiᅇ, me undihi yabuᅇa yapmewaᅇaᅇ.

⁷Du a nadilaᅇ, me kayoᅇbop kadoko tilak adi yadi Bepaᅇ'walaᅇ kwanai tilak. Unduᅇ doktiᅇa metamdi kaune me didimeᅇ eᅇ yomnit mokit tuluwaak. Tiᅇa undugoᅇ adi wougigitnit yoᅇa metam kaka mu yabudokoluwaak, eᅇ kwihita pilap mu tuluwaak, eᅇ ime fafaᅇneᅇiᅇ naaᅇ nadibubuye mu tuluwaak, tiᅇa undugoᅇ metam kaka widihifit mu tuluwaak, eᅇ muneᅇ bombonoᅇ fee moᅇgotdok mu nadiluwaak. Mokoᅇ. ⁸Adi yadi metam yohineᅇ buune momooᅇ tiyemuluwaak. Eᅇ adi yadi titiᅇ momohi hogok yabukahileᅇ nadinadi momohi u hogok takaliluwaak. Adi yadi titiᅇ didimehi hogok takaliᅇa Bepaᅇ'walaᅇ titiᅇ hogohogok u tuluwaak. Tiᅇa ne'walaᅇ hatihatᅇiᅇiᅇ u momooᅇgoᅇ kadokoluwaak. ⁹Tiᅇa undugoᅇ adi mede biyagoᅇ hinek dibek nintubudidimeᅇiᅇ u hogok honefafaᅇeᅇ hatiluwaak. Ala wendoktiᅇa metam mede biyagoᅇ hinek hogohogok u kedem yenindidimeune nadisukilitineᅇ, kaᅇ wendi welehiᅇ youlune mede u kedem takalineᅇ. Tiᅇa undugoᅇ me Mede Momooᅇ dobu-uyat tiᅇiᅇ heki u mede fafaᅇeᅇgoᅇ yenimbune yomhik u kedem kaᅇ nadidakaleneᅇ.

Metam feedi noli'walaᅇ nadisukiliti tubukadakagiᅇ

¹⁰Uᅇgoᅇ adi metam feedi mede kelekehinit eᅇ mede hogohi folooᅇhinit mokit yoyo tiᅇiᅇ eᅇ tikamandahinitdi hatiᅇiᅇ. Judahi me undihi feedi kayoᅇbop maaneᅇ uᅇgoᅇ hatiᅇiᅇ. ¹¹Me heki woᅇ adi titiᅇ kadakahi tiᅇila metam'walaᅇ muneᅇ bombonoᅇhik moᅇgotdok tiᅇiᅇ, unduᅇ tiᅇale titiᅇ hogohi undihi mu titiᅇdok u yenindidimeᅇiᅇ. Talik unduᅇ gineᅇ metam fee eᅇ memalam eᅇ wapmihihye bop niᅇ hatiᅇiᅇ adi'walaᅇ nadisukilitihik tubukadakayemiᅇiᅇ. Wendoktiᅇa du yenihep tubune adi mede undihi mu yoyaneᅇ.

¹²Koom Kilitniᅇ nadinadime niᅇdi indiᅇ yoguk, "Metam Kilithi adi yalaᅇ-metam. Adi yadi kale moiᅇ nabugoᅇ me hogohi hinek. Adi yadi nanaje gibitaᅇ natokiᅇa gweheye bilintelet tihatidok hogok nadiᅇiᅇ."

¹³Mede yoᅇ adi biyagoᅇ hinek. Unduᅇ doktiᅇa titiᅇhik tubudidimeᅇ Bepaᅇ nadisukiliti hinek timineᅇdok du mede fafaᅇeᅇgoᅇ yeniluwaᅇaᅇ.

^a 1:5 Kilit kwet kambangit u kwet welewele pepa hapmuᅇ 268 foloᅇ kaweᅇ.

¹⁴Karj adi Judahi'walaŋ molodagi eŋ kahat komihi wendok magi kametnadi mu taneeŋ, tiŋa undugoŋ me mede biyagoŋ hinek sigilulum timiŋ heki'walaŋ yodoko medehik u mu keleyaneeŋ.

¹⁵Welehek walaniŋ hatiŋ adi yadi nemenemek hogohogokdok nadiune geŋgeŋhinit mokit tilak. Eŋ kadakaniŋdi welehek tubugeŋgeŋ tubune nadisukilitihinit mokit tigiŋ hatiŋ, adi yadi nadinadihik eŋ welehek wanakaŋ geŋgeŋhinit tubudapmagiŋ doktiŋa nemek niŋdok nadiune walaniŋ nemu tilak. ¹⁶Adi mahikdi Bepaŋ agaŋ nadimiyam, unduŋ yoiŋ. Iŋgoŋ oŋ, titiŋhikdi Bepaŋ agaŋ sigilulum timiŋgiŋ unduŋ yobihitak. Adi yadi me mede kelekehinit doktiŋa adi nemek titiŋ kedem niŋ tineeŋdok tuwot moŋ. Titiŋhik adi madimadikeŋgoŋ.

Metam kilitihi adi titiŋ didimehi titiŋdok yeniŋguk

2 ¹Du yadi Bepaŋ'walaŋ mede hogohogokdi titiŋ dedihi keledok yolak u metam yenindidimeune nadiyaneeŋ. ²Du me agaŋ kiliti tiŋ heki u ime fafaŋeŋ naaŋ nadibubuye mu titiŋdok yenimbaaŋ. Adi yadi titiŋ dediŋ taneeŋ u didimeŋgoŋ hinek nadiŋa nadinadi momohi hogok takaliŋa tiyaneeŋ. Adi yadi Bepaŋ'walaŋ mede biyagoŋ hinek u momooŋgoŋ hinek nadisukilitiyaneeŋ, tiŋa undugoŋ metam noli welehidki yabukahile tiyaneeŋ, eŋ malabumuŋ gineŋ fafaŋeŋ yali malabumuŋ beemdok u maŋ nadiyaneeŋ.

³Tiŋa undugoŋ, du tam kiliti tiŋ heki maŋ Bepaŋdi hatihati didimeŋiŋ hatidok nadilak u undugoŋ yenimbune hatiyaneeŋ. Tiŋa adi metam noli yenimpekik mu tiyaneeŋ. Eŋ adi wain imedi nadinadihik mu kadokoluwaak. Adi yadi metam nolidi titiŋ momohi titiŋdok yenindidimeyaneeŋ. ⁴Unduŋ tubune tam kuya yohohiyehinitdi yohohiye tiŋa wapmihihaye yabukahile hinek titiŋdok titiŋ u nadidakale tineeŋ. ⁵Eŋ nadinadihik momooŋgoŋ hinek kadokoŋ Bepaŋ dawineŋ walaniŋ hinek hatineeŋ. Tiŋa undugoŋ yohik momooŋgoŋ kaututumedok titiŋ u nadineeŋ, eŋ yohohiye tiŋa wapmihihaye titiŋ fofooŋ tiyemdok, eŋ yohohiye'walaŋ hebehik gineŋ hatidok u nadineeŋ. Adi titiŋ unduŋ nobu tineeŋ adi metam nolidi Bepaŋ'walaŋ medeŋiŋ u tuwot mu yotubukadakaneeŋ.

Taitusdi mekuya hekidok talitimenŋ momooŋ tiyembekdok niŋguk

⁶Mekuyahi maŋ undugoŋ yenindakaleune adi maŋ undugoŋ titiŋhik momooŋgoŋ kaulidokoyaneeŋ. ⁷Nemenemek hogohogok tuluwaaŋneŋ, uŋoŋ da maŋ titiŋ momohi hogok tuluwaaŋ. Unduŋ tubune metamdi da'walaŋ titiŋge uŋakoŋ yabuŋa yehikeleyaneeŋ. Du metam yenindidime kwanai tiŋale mede folooŋnit yenilaŋ nadikaŋ baigoŋ hinek yenintitiŋeneluwaaŋ. ⁸Du mede didimeŋiŋ hogok yenimbaaŋ woŋ, metamdi malabumuŋ uŋoŋ nemu tubumintaneeŋ. Karj memikniye

adi maan medehaki tuwot mu nininetinjit. Mokonj. Adi yadi tobonin nehi'walaŋ nadinadihik kadakahidok meka tineenj.

Tipilapilaye me adi mede tiloloŋhinit hatidok yoguk

⁹Du tipilapilaye-me heki yenimbune bombonŋihiye gikiŋgoŋ tiyemiŋa hebehik ginej hatiyaneen, tiŋa bombonŋihiyedi kwanai kaune utumba titinŋdok taneen. Adi yadi me bombonŋihiye mede tobonin mu tubu-udaneyemaneen. ¹⁰Unduŋ tiŋa bombonŋihiye'walaŋ bombonj kubo mu moŋgokaneen. Mokonj. Adi yadi bombonŋihiye'walaŋ medehik momoŋgoŋ hinek takaliune me bombonŋihiyedi titinŋhik wendok nadifo tiyemaneen. Unduŋ tiŋa nemenemek hogohogok taneen u tipilapilaye-me hekidi metam yehitubu-lodaune Bepaŋ Tubulodanik'walaŋ medenjin yohautayam u wougigitnit tibaak.

Bepaŋdi siloŋ tobogoŋ tinimiŋa ninindidimelak

¹¹Indi a nadiyam. Bepaŋ'walaŋ siloŋ tobogoŋ u miŋgilanŋoŋ agaŋ mintagak. Kaŋ wendigoŋ metam hogohogok kotigoŋ kedem yanagitak.

¹²Bepaŋdi siloŋ tobogoŋ tinimiŋa indi adi'walaŋ titinŋinŋ takaliŋa kwetfoloŋ metam lekiŋgoŋhik ginej nadididime tiŋale didimeŋgoŋ hatidok ninintitiŋenelak. Tiŋa undugoŋ kwetfoloŋ diniŋ nadigalika moŋgola Bepaŋ sigilulum mu timindok maan nininilitubu-didimelak.

¹³Untubu Jesu Kilisto'walaŋ nai wondok baigoŋ nadikunakunaleen woom-hatiam. Biyagoŋ kuyoŋ, adi Tubulodanik eŋ Bepaŋ Wapumnikdi saŋiniŋnit eŋ hautanit miŋgilanŋoŋ mintadakaleen kahaŋ tinimbune kaneem yoŋa nadifo tiŋa woom-hatiam.

¹⁴Kilisto adi metam kotigoŋ ninigila kadakaninŋnik hogohogok tumolokutnimdok nadiŋa ne'walaŋ hatihatiŋinŋ bikabuguk. Eŋ indi walandaan ne'walaŋ metamŋiye hatiŋa titinŋ momohi hogohogok u fafaŋe tiŋa titinŋdok yoŋa unduŋ tuguk.

¹⁵Du helemahelamaŋ metam mede i yeniluwaan. Tiŋa mede u takalidok yenimpilapilaye tuluwaan. Du adi me mede kelekele tiin heki adi titinŋhik tubudidimedok mede saŋiniŋnit hinek yeniluwaan. Eŋ du biyabune nebek niŋdi du'walaŋ medege u nadiune fofonŋnit adi mu tibaak.

Bepaŋdi titinŋ momoŋ tiŋa kadakaninŋ ginineninŋ ninigikuk

3 ¹Du adi'walaŋ nadinadihik tubukaikaune mapme be gapman, eŋ me loloŋhinit gikiŋgoŋ tiyemiŋa medehik tagimneyaneen. Unduŋ tiŋa kwanai momohi mebimebi hakiin u lodaan taneen. ²Unduŋ tiŋa metam noli yenimpekit mu tiyaneen, be tosiwe maan mu taneen. Helemahelamaŋ adi kulemaŋgoŋ hatiŋa metam wanaŋ titinŋ momohi hogok tiyemaneen. ³Da-ku agaŋ nadilaŋ, indi maan koom nadinadinikdi didimeŋ mu halune mede wobu tagumun. Sadaŋdi nininŋkamanda tubune

indi Bepañ'walañ talii mu kelegumun. Woñ adi siloda mebimebi diniñ tipilapilaye-meñiñ eñ foloonik diniñ nadigalika gineñ hatiyagumun. Tiña undugonj indi koom me noli'walañ nemenemek u yabusilodaan kikakwihita tagumun. Unduñ tiña me nolidi memik tinimbune indi maan undugonj kibibo memik tiyemagumun. ⁴ Ingonj Bepañ Tubulodanik adi nibukahile hinek tiña silonj tobogonj tinimiña titiñ momoonj hinek tinimilak. Titiññiñ u miñgilangonj mintadakaleguk ⁵ nai uñaniñ adi kotigonj ninigikuk. Adi inde'walañ titiñnik didimeniñ doktiña mu ninigikuk. Mokonj. Adi ne'niñ welebulaningonjñiñ doktiña kotigonj ninigikuk. Adi nihiyoutela nihitubu-kaikaune kobuli mintagumun, kañ Uñgoniñ Munabulidi hatihati kobuli nimguk.

⁶ Jesu Kilisto Tubuloda menik'walañ kwanaiñiñ diniñ foloonj Bepañdi Uñgoniñ Munabuli gibitañ kwatnenimilak. ⁷ Kilistodi silonj tobogonj tinimbune Bepañ namanda folonj indi metam didimehi mintayam. Indi hatihati dapmandapmañnit mokit u kahiledok Bepañdi nibukahileeñ unduñ tilak. Hatihati u indi dibek nadikunakunaleeñ woomhatiyam uñakonj. ⁸ Mede i biyagonj hinek. Unduñ doktiña du nemenemek wendok sañiniñnit hinek yohautaweñdok nadilat. Unduñ tubune metam Bepañ nadisukilitimiññ heki adi titiñ fofoonj u gigne tiña taneeñ. Titiñ undihi u momoonj hinek, doktiña metam wanakañ yehitubu-lodalak. ⁹ Unduñ tiña me tokwihita eñ tosiwe tiñ eñ papahiye eñ dadahiye wohiye kunalu labulak eñ Moses'walañ Yodoko Mede gineñ mede hakiñ diniñ mede mebidok siwe tihatiñ, du me undihi'walañ mede kaulehi wendok magi kametnadi mu tiluwaanj. Indi a nadiyam, mede hogohi hogohi undihidi titiñ momohi takalidokneñkade nemu nihitubu-lodaiñ. ¹⁰ Me niñ kayonj bop ulitawadok titiñ tubune kañ du me u nadinadiñiñ tubudidimedok mede niluwaanj. Du nai kubugonj be nai lufomuk wendok tuwot unduñ tiña kaluwaanj, adi mede mu nadiune kañ bikabudapmaan sigilulum timiluwaanj. ¹¹ Da-ku a nadilañ, me undihi adi talik fofoonj bikabuña kadakanij titiñme mintalak. Kañ ne'walañ kadakanijñiñ wendigonj mede gineñ kambiyatak.

Yodapmañ eñ yokahanj

¹² Nu Atemas be Tikikus niñkulene du'walañ uñonj busuwaune kañ pilap buña Nikopoli yokwetneñ uñonj nehitubu-mintawaanj. Nu gwi sububa nai gineñ yokwet uñonj hatidok nadilat. ¹³ Metam'walañ yodoko mede diniñ nadinadime Senas eñ Apolo adi momoonjgonj hinek yabudokowaanj. Du nemenemek tali uññdok moñgo udemeek u yehitubu-lodaan yembaanj. Unduñ tibaanj kañ talik udemeekneñ uñonj nemek niñdok baniñ nemu tidemeek.

¹⁴ Indi'walañ metam adi kwanai momoonj titiñdok lodaloda tiña nadineeñ. Unduñ tiña metam nemenemekdok baniñ tiñ u yehitubu-

lodadok. Tigene kayonbop heki adi hogok hatiņa Bepaņ'walaņ titiņņiņ mu takaliņa tineeneņ.

¹⁵Metam hogohogok nukut hatiņ adi youtumba mede kamegamiij. Ale dubo indi'walaņ youtumba medenik i metam Jesu nadisukilitimiņa indi nibukahile tiij adi hekidok yenimbeņ. Bepaņ'walaņ siloņ tobogoņdi hidut wanaņ halaak.